



海國四說序

三代後惟漢元聲威所至視周秦唐宋爲  
遠然亦止西北關塞而外未聞越葱嶺而  
訖西壩卽歷代市舶駢集廣閩大率來自  
東南洲島故自元以前尚不知有西洋諸  
國明初鄭和返命內臣接踵而往費氏天  
心紀行吳氏朝貢兩錄出張氏東西洋考  
繼之而後海西島嶼略有稱名其時舟航



梭織所經復有亞非利駕亦云利未亞地卽今之所稱曰第三洲合大浪山迤西別爲一區者也萬歷以後西人遵海遠求荒僻又得亞墨利加之北移人實之旣又沿沂而得其南終更冒險以抵極南生火之地雖不可居而墨瓦臘泥加之名緣是起焉然當利瑪竇之來禮臣據會典但知有西洋瑣里尚未知有大西洋陳氏之錄海國聞

見在我

朝定鼎之初圖繪大地全形猶不越前三方者蓋明末紀綱失馭無以柔遠貢國日少聲教不通陳氏採掇之疏厥端有在逮奉聖化覃敷南洋開禁重譯旅來敏關受廛如遊闔戶八市之有合省國卽新闢亞墨利加之曠野而若荷蘭若噶喇西若暎咭喇若喘若噠則統逮於西洋其始皆因貢得市

後則凡其種類與其屬國並得以有易無  
二百年來所以沾濡美利涵泳

皇仁者可謂極深誠渥浹髓淪肌矣諸國之始至  
也荷蘭以助勦海逆貢市最先而意大理  
亞次之博爾都噶爾雅又次之暎咭喇又  
次之暎咭喇雖奉冠帶稍後而貢獻頻數  
一時恭順實出忱誠未嘗以其使臣之失  
儀辱命而盡絕之也夫西國之風氣惟利

是圖君民每聚貲合財計較錙銖之未跋  
涉數萬里累月經年曾不憚其險遠來市  
雖衆率貿易工技者流習狃夷風方自以  
稅重貨多日持市道之見與爲窺測大體  
所在開喻原難故從來馭夷之方惟事羈  
縻養欲給求開誠相與毋啓以隙而挑以  
衅是卽千古懷柔之善術蓋其人生長荒  
裔去中國遠不覩聖帝明王脩齊治平之



道不聞詩書禮樂淑身範世之理所得內地書籍出於市商之手徒求值賤罔裨貫通更畏例嚴購求忙雜又飄棲異域必無淹博紳賢古義邃精豈通解証彼縱堅心求學而擇師乏術從入迷途薄涉淺嘗皇一漏萬無足以生其悅服啓其機緘夫是以始終墨守舊行之教遞相傳述輾轉附益不知所考則信奉愈堅不知所疑則觸

發無自意五口通商之後固專於牟利亦樂於行教信教之心愈篤斯傳教之意愈殷傳欲其廣信欲其速於是動以語言勸以文字誘以禍福凡可以聳人聞聽者將無乎不至議者極其事之所底有慮其中於風俗人心而無如何相與喟然太息者矣雖然無足慮也其爲言也淺淺則不耐人思索雖質至庸常者亦將異說存之况

聰穎之士乎其爲事也虛虛則徒令人疑惑雖素講因果者猶必空文視之况禮義之俗乎且其教主之種種奇能異蹟姑無論僅從千百年後得諸傳聞就令事事不誣不過中國道流之戲幻彼生長窮荒聖教所不及之地耳濡目染沿遞徵說凡應考筮仕並出於斯里巷常談殆同讀法牢不可破曷怪其然誠使明性道之大原聖

賢之彝訓與夫古今治亂興亡之迹日用倫常之道不啻居漆室而觀日星濯泥塗而升軒冕其不思而悔悔而轉轉而棄者無是人更無是理也夫周孔之道洋施本速於傳郵特前此西海之外舟車阻之俟其從容向化勢已緩矣今則招徠旣廣望光而踵至者未嘗限以工賈之輩邇者

皇上擴天地之仁恩施格外聽其購求典籍延



致中土儒生大地同文兆端於此他日者  
設能盡得聖君賢臣孝子悌弟義夫節婦  
之見於紀載者有以次第講習牖其愚蒙  
引其嚮往將所謂思悔轉棄者直旦暮間  
事是蓋聖教普施之漸之有以發其機而  
操之券又安有人心風俗之足害也哉子  
以讀禮家居取舊所聞編成四說先詳彼  
教之委曲而折衷之以聖道并其所習聞

之說考證焉而明其所出而後其教可聽  
與方外並存曰耶穌教難入中國說次舉  
八市之國之所稱貨多稅重者爲之各臚  
其風土起滅之由一冠以中國年號自案  
牘以逮時賢撰著叅以彼所自說誕異者  
仍而正之而後始末燎如用資聞見曰合  
省國說曰蘭崙偶說而終之粵道貢國凡  
貢道之由廣東者紀其年月品物

錫賚筵燕而厚往薄來之義見焉貢道不止粵東謹就耳目所及不敢濫也粵道不止西洋附以暹羅諸國從其同也卽稱臣納費之故可共曉然於

天朝厚澤煦育已深不特思義顧名群安無事抑更沾濡聖學勉作異域循良之民則聖代聲教夫豈漢唐以下比哉區區之懷如是而已不日記而日說者以中國人述外國

事稱名自有體制且非足跡之所及安知其信固不敢援李思聰之百夷傳候繼高之日本風土記爲例也編成輒序其大凡於簡端

道光丙午年正月梁廷枏自序



海國四說

耶穌教難入中土說

海國四說目次

耶穌教難入中土說

合省國說

蘭崙偶說

粵道貢國說





耶蘇教義

中國說

序

耶蘇得以其教行於所近諸國久矣領其教曰  
鐸德者四布徒衆遞爲勸引往往不遺餘力非  
若 中國聖人之在宥羣生聞風自起也是故  
先之以言不入則資之以利不入則竟劫之以  
威上好下甚下好上從何怪乎一方百十國之  
靡然向風影隨而響應哉漢代去秦火未遠遺  
編日少故老漸凋雖在中朝猶將曲學爭鳴方

且見異思遷遠求佛書於天竺矧僻陋在夷之俗又安識聖帝明王文物聲名之別有所在獠狂蒙昧第率其好爭喜殺互爲雄長之常民生日衽席於鋒鏑死亡中物穉而未得所養也途歧而罔識所歸也一旦而耶穌生於其閒創爲一說開其地從來之所未有復與其門徒弟子各勵其果敢堅忍之志強辯重贅之舌鼓力協心罔憚車航險遠開關以遊於四國家爲之喻

戶爲之曉不啻木鐸之徇道路焉而其爲說也則又專舉人人所必敬共敬之天體使返思而尊崇之確指人人欲識未識之天心爲鑿空而顯釋之斯固有以取諸其人之意中而出諸其人之意外矣其立爲科條也則又寬之以倫常日用而畧限之以持齋戒殺樂行所易自不畏所難矣習之以地獄天堂而卽終之以審判復活因以其常自推信其變矣淺之以啓其可從



又歆之以使其必從而且更惕之使其不得不從而適當聲教未訖之時爭殺相衡之會機觸必動勢在必轉夫是以趨之若鶩一發不可復遏以迄於今也然吾固嘗深思其教之所從出與夫所以得行之故蓋有疑而未安者焉夫持齋戒殺佛氏之宗旨也西北酋長素詡仇戮不如是則民無噍類矣天堂地獄佛氏所借以勸善而戒惡者也神道設教過鑿反誣故輪迴受

生儒門不道然今之喇嘛以化身而轉世者蓋有之矣耶穌生佛涅槃二千餘年後宗旨與釋氏畧相等其撰遺經書意質語淺聖母經目似本救度佛母經爲胚胎而佛說諸經多以奉持效驗爲文辭今其教之所謂信經十字經者立意亦猶是耳豈天厭殺亂別增一教於西海窮陬使相爲表裏乎顧何以入主出奴各不相下也回教肇始謨罕驀德所稱幼而神異能自造

經典敬天禮拜者八思巴七歲誦經數十萬言  
其徒能吐火吞刀其教許娶妻生子與耶穌之  
生有異質善諸幻術男婦皆可入教者何適相  
似耶宗喀巴經之言達賴班禪轉生期以六世  
與耶穌教所引古經預書其降世救人奇蹟者  
又何適相似耶三者皆後於耶穌豈其事其說  
偶若轍合耶抑耶穌雖生漢代其書實晚出行  
世後起者特即三者之前事彙託之一人以自

相誇大耶不然胡爲乎信之者目覩轉不若耳  
聞之多也不然胡爲乎受刑在建武八年月果  
東行示變而漢志乃竟從缺也姑無論西邦自  
爲文獻紀載所在牴牾無足深辨也就令變水  
爲酒叱風遏浪一切皆實有之要不過師巫一  
時戲幻之術正佛氏之所謂下乘者中土如葉  
法善冷謙輩皆所優爲卽死去旋活當亦與尸  
解無異其人殆不可勝計然在當時止自證其



道自成其仙初未聞有普招庸衆奉爲教主之事而一耶穌乃令人震驚若此信乎少所見者之多所怪而教之傳否必視夫所傳之地爲幸不幸矣凡皆不能無疑於吾心者也且伊古以來論盛德大業至五帝三王止矣頌揚五帝三王之德業縱極其推崇亦至稱曰開天曰繼天曰則天配天止矣以雜教言如墨德墨克固葱嶺以西所最信服者也顧羣稱之曰天使以爲

無以復加矣今耶穌明明與人同生死乃旣名以天主之尊更實以分天之體與援神契之稱太山爲天帝孫博物志之稱帝二女居洞庭異矣嗚呼其稱名亦甚矣天分其體禮拜謂何非所謂曰戴而忘其高耶夫以是而行善求福亦善其所善矣此尤不能安於吾心者也自來知命者不立巖墻故明哲爲保身之要耶穌以一介編氓處父母之邦日以行法聳動於人國招

時所忌不得其死使其先能知幾當不至是今  
取其所爲而懸揣之旣慮人疑行教之不免教  
將緣是中止也於是設爲捨死救人之說因以  
死後復活者明其生有自來歿有所爲則雖橫  
死而不足生向教者之悔矣又慮人疑篤守教  
而乏近報勢必久而思去也於是設爲復活審  
判之說先以茫無定期者使之預爲其地益固  
其心則雖遲久而不足以絕入教者之望矣所

謂語切則易從勢在則易轉者其故如此自明  
綱失馭而後利瑪竇龍華民艾儒畧諸人相率  
踵至粗習中土文字加以儒流爲之潤飾宮中  
亦燬所奉佛像而偏崇之南都則傾信者以數  
萬計蓋禮教刑政失於上奇表跛僻興於下而  
樞紐之交又在易七日之拜爲朔望隨俗所便  
故說驟得行

皇朝正學昌明風俗醇厚乾隆間閩粵之相傳



耶蘇教類入中國說序  
習者偶有一二無業游民利其貨用實則陽奉而陰違之自是之後已絕根株邊壤數十年來胥忘其事無所用其操切近日廣予通商市地既廣行教者涉險遠來然自求厥福不爲民害如聽其自存一教亦昭柔遠之義爰撰爲此編以告我中華之欲悉其源流巔末者夫飲水而先得中治卓錫之味有同嗜也鹹鹵在前則止之而毋庸止矣相馬而先得超踔騰越之才有

同愛也駑駘在前則舍之而毋庸舍矣彼懸空預擬善其所善之談今雖盛行西國倘他時聖教所被識見日開必將有辨江心之味思冀北之羣者機勢所在不券而符況生際文治精華雲漢昭回之盛如

聖朝今日者哉

道光二十有四年甲辰十一月朔梁廷枏自序

耶穌教難入中國說

廣東澄海縣訓導順德梁廷枏撰

總論彼教必將為聖道所化是作說之緣起

夫人抱其一說非其所甚便且安則見有更便

安於是者可以浸而移之何也彼固先具一可

移之勢而移之者乃會逢其適也今日耶穌之

教在西海諸國推行日廣有舍舊所從佛氏而

信之奉之者矣然非徒恃耶穌之徒之果足以

招之也佛之為教也空空則愴恍無憑使人并



其父母妻子而棄之於人匪便則其先已不安於心非如中土堯舜禹湯文武周公孔子之道之本乎人情入人至深而不可拔者比特無所以啓其端遂相沿不改耳一旦耶穌之徒舉人日戴之天勸人尊而事之其爲事較實從其教者問心亦較安而審判復活之說又與世俗樂生畏死免禍求福之心適有以相入而且爲期無定一時難露其隙事匪難行而死有餘望

於是因利乘便去如轉環矣夫以堯舜禹湯文武周公孔子之道治孝弟親長之天下視耶穌之所云人死而復活於將來之一旦者其虛實相去何如使信耶穌之教之人得盡讀其書暢明其義必將有較西海諸國之不安於佛教抑又甚焉者今日者其轉環一大機關也而彼顧方欲以其教遍中外而行之則亦未明乎勢之所在之有以驗於後日而兆於幾先耳是不可

此下溯彼教之源

以無說按天堂地獄之說似與佛氏六道輪迴之旨不謀而合然泰西人守耶穌教者輒指斥佛法爲異端謂漢明帝時耶穌道已先行天竺國爲其所誤聽誤傳致亂其真從此乃造出佛教一端適明帝不知其故使往求書并其徒挈入中國因而中國人亦浸被其惑搏土刻木圖其像而崇奉之以迄於今且謂明帝爲人父而崇無父之教居君位而容不臣之人其所以

詆訶佛法以爲土木皆人手作之物如羅漢菩薩者乞靈無益雖僅指其設像之粗迹者以爲言然觀其與佛相讐真若有痛深惡絕各主門戶相持不下者其攻擊固已不遺餘力矣故凡尊耶穌者至稱之曰天主其教亦曰天主教行其教者謂之正道謂之善人遵佛法者卽謂之邪教謂之異端諸國中有先行佛法後變於耶穌者則稱之曰改邪歸正其間亂亡爭戰往往



皆緣於此大抵歐羅巴人之重此教其來雖遠然實始盛於前明嘉靖間前此尙疑信參半也溯天主教之始蓋原於摩西而耶穌後出始則推衍之繼乃漸變之語詳下摩西既死其子孫乃出所遺書以行於世半傳於亞細亞洲之西希伯國半傳於歐羅巴洲之東希臘國合而全之謂之古經亦曰古遺詔書謂摩西得天之默示所言自夏訖漢皆耶穌未生以前時事其曰新

經亦曰新遺詔書者謂如大民遷復本國時師士再得天啓之語預指耶穌救世之事兩者並尊之曰聖書曰真經其摩西後耶穌前諸信奉者所纂兩詔之意則謂之經錄所傳洪荒以前事曰歷史其紀載耶穌之說者曰寶訓曰嘉音耶穌之徒如馬太馬可路加若翰四人各有專書馬太述古聖所預言而舉耶穌之蹟以爲驗馬可多傳奇蹟兩人又互有詳畧路加每詳舉

耶穌言論若翰則描述他日耶穌降世審判時  
之情狀此數書者皆意主傳教統謂之福音自  
明季以後西士如利瑪竇艾儒納龍華民費奇  
規輩並通中西文字其所撰著如四字經如諸  
經解會中規約之屬最多不可枚舉歐羅巴諸  
國中凡設學教人所傳所習一以諸編爲牖聰  
明立性命廣教化之極則所云聖書者今不可  
得詳無由盡知其體例惟近日如泰西之英吉

利亞墨理加之合衆國並喜購內地書籍延中  
士人至彼教以漢字漢語能畧識中土文義繙  
譯而出所刻傳書籍每援引是書詞未暢達又  
從譯轉益易淺俚僅可會意而得之所引聖書  
有小註稱見詩書第一百零十五詩者以是推  
之則其體例似亦分門別類云詩書者當是門  
類之目也歐羅巴人嘗盛稱周康王時有大辟  
王者作咏聖詩垂後又稱穆王時希臘國人馬



和所作之推論列國詩及國朝順治間英吉利國人米里屯所作之論始祖駐樂園事詩並推爲詩中之冠據此則西人亦尙吟咏所云詩固不自聖書始矣按新聞紙有律詩格韻一如內地法原耶穌此下推行設教之意教意在胥天下萬國而遵行之故信之者必遞相傳引日以廣行其教爲事年來泰西所月行之新聞紙譯出傳入內地固半屬勸人持教邀福近復有習讀中土書者自刻其所得聖書中

要旨詮釋而序行之遣人於粵東會城市集之地按戶遺送其自序稱幼學師訓於真經奧義頗覺通曉深悉聖書情理真確知中國人向未得聞是以不遠數萬里重洋至此學中國語言文詞意在傳道奈例禁嚴不能入內地茲擇聖書最要數款刻之云云今就予所見西國書及所傳送書之援引聖書者并耶穌教原遺諸書各撮其大意爲之條理其說而薈萃縷晰

著之於後而後再加以論斷俾知其教之難行

於此地以為他年符券焉其說此下詳列彼教之說以為未有天地

先有天主所謂先引後論得其曲折乃足服之也即天道之主宰天地人物之所

從生故為人之大父母其初始造物之功凡六

日而備具第一日生最高之天西洋人陽瑪諾撰天問畧自序

稱第十二重不動之天為諸聖之所居天堂之

所在奉天主者乃得升之書總目提要謂其歆動下愚欲借推測之有驗以證天堂之不誣無數天神共

經緯九萬里之地地有四大穴一曰永苦二曰

煉獄三曰孩所四曰靈薄即古聖之所並為地

獄永苦者人犯大罪不知痛悔而死則罰入於

此與魔鬼同受蟲咬火燒之苦不可復生靈魂無形

而地獄中別有火可以燒之譬如胃火可燒化

禽獸血肉而不可化人肝腸樟腦火於水中燃

之益熾地獄火亦然非凡火也又別煉獄者信

有一種毒蟲蛇專能食人之靈魂者煉獄者信

教之人悔罪而未能以善全補故以獄火煉淨

其罪然後使升於天堂也孩所則幼殤之有原

罪而無本罪者居之人有原罪本罪之不同說見後靈薄者凡



古聖已死宜升天然必俟耶穌補贖人罪其功

完滿日乃得挈之而升故咸集於此以待之也

第二日生九重天土接水水接氣氣接火火接

天謂之四元西洋利瑪竇撰乾坤體義以水火土氣為四大元此則據四字經不

知其所出也 欽定四庫全書總目提要

謂此與佛經同佛經所稱地水風火地即土風即氣天包乎地地四面可居自地而仰望者皆

氣也第三日生山海草木五穀第四生日月

星辰第五日生水族羽族第六日生毛族百獸

第七日造物已畢帝亦自是安息天主教七日

禮不然後搏土作人由是配合生育凡人血肉

之體生於父母而靈魂則賦於天主魂在身則

生離則死身雖死而魂長存有始無終故謂天

主為天地萬物之本其體為獨神無形與聲自

有萬萬美善萬萬榮福論性則有一無二而其

位則分之為三焉一日罷德勒華言二日費畧

華言三日斯彼利多斯彼利多華言神也

子也

謂神聖也亦稱神聖風謂凡人新信入教皆此風感之皆為天主第一位

罷德勒於無始之時生第二位費畧明照自己本性遂生

本性之像如鏡中能照本身也故罷德勒為父而費畧為子即

耶穌也兩者又彼此相愛而發斯彼利多三多

是為第三位天主如日有輪有光輪能生光輪與光合而發暖熱三者如日

之分合也所謂相愛而發其譬如此三位無前後無大小統尊之

曰天主而已自開天二千四百五十餘年西人古今

紀事錄云自開天至天與摩西論飭世人時世有二千五百十四年其諸說參差多類此

忘聖教天乃令聖每瑟下降造古經使人為善

復至一千五百五十年聖每瑟之古經又亡故

第二位天主耶穌緣是降生救世耶穌之遠派此即明史所

引六千年史書在其國者則直自有人類以來一一可次其世代而追溯

焉其始也地本空曠無物水漲地面上帝浮水

面以造萬有隨賜人以形如帝之像以地塵甄

陶之吸活氣於其鼻而賦之以靈魂令海之魚

空之鳥田之獸土之蟲凡生生之類人盡得而



耳魚卷第八口圖說  
有之物之各有一名皆自人呼之遂以爲定者也東方有樂園者川水流其中木之良楛美惡咸植焉使所造之人守之以無偶不可廣生也爰伺其睡損彼肉而益於此令相配偶蓋女從男出祝之曰其必蕃滋至滿大地是卽天下人之始祖也男名亞大麥卽亞姆譯言土也以土而生也女名依活譯言活也萬人所賴以活者也

一云男名亞當女名厄穢爲人類之宗見解信經問答註

當奉帝命同

居樂園時戒勿食園中所樹木實謂食則必死當時園中並造百類惟蛇屬最狡獪欲給女違帝戒遂勸以能食木實則兩目清明可以辨物善惡如神天然女旣垂涎果實之味聞言遽採食之並分食其夫兩人者果一時並能開目見物覺已裸裎可羞亟編木葉自蔽其體時氣候正涼上帝方來遊於園夫婦自知違戒罪匿影林中帝呼其夫曰若安在應曰在此胡不出曰

聞帝至恐露體得罪不敢見帝詰之曰誰告汝以露體者且我誠汝勿食果實其食之否答曰婦實使我食之帝詰婦婦曰蛇實誘我食之帝謂蛇當令汝受咒詛過於他物行必以腹終其生食塵土汝類世與女子爲仇女子亦見必仇汝又謂女當令汝孕育艱苦且心恆愛戀其夫而夫每嚴密閉汝又謂夫當令汝自食其力勞苦終身但以田所生草爲養必泥塗手足而後

得食因汝始以塵賦生故令死仍歸塵土夫婦於是愧赧逃去蓋人之初生其心本善迨變而之惡沾染物欲遂羅罪網今之夫勞苦而婦難產實受天罰而忌嫉煽惑致人於災禍如蛇者禍人適以自禍也夫婦旣以違戒被擯樂園又別設神守不復可入乃棲止別地以永生育生二子長曰設是爲第二世業農少爲牧感神天恩各以其業所出者祭帝而供之帝不享其兒



之祀而歆其弟之犧牲兄愧甚遷恨其弟欲殺之神天早知其意輒問以弟所在答曰我豈弟之護身耶帝因力戒兄勿含蓄仇怨因詛令飄零四海蓋謂後世凡浮踪浪跡於他鄉者皆不友於弟所受罰也天下五大洲夫婦實生亞細亞洲之西方其裔乃遍中外生息日漸蕃滋年亦極壽自六百以至九百有餘歲散處九垓民物雖較昌盛而人世之惡與日俱生天於是造

爲律條凡禽獸鱗介蟲魚悉聽人用且食之惟人爲同類其受形賜自上帝一有仇殺是傷同類而壞帝像也故首戒殺人又凡一夫一婦自爲匹配有以一身而娶至二三女子者及蓄養奴僕役使其同類如犬豕者祀土木神偶致敬天不專者皆爲背律神天則罰之而凡誠志尊崇上帝不僞不二者則福之

耶穌教有妻無妾無奴婢禮拜外不

祀他神每勸人棄土木偶意皆本此設生以挪士爲第三世以挪

士生該南為第四世該南生馬利列為第五世

馬利列生雅烈為第六世雅烈生以諾一云以諾革

為第七世以諾能嚴遵天律奉祀最虔帝悅其

謹愿提之升於天堂使永存不死生米土撒拉

為第八世米土撒拉生拉滅為第九世拉滅生

挪亞為第十世即諾厄譯音異也當洪水之先人多為

惡犯天怒將大懲創之念諾厄不可與其難乃

命預製一櫃一云命為一舟中為三重置己及三子三

子婦於中諸用物悉備於是大發洪水四十日

殄滅人物水退諾厄父子復得居陸地三子長

名閃次名哈麥一云長名生次名岡三名雅佛德後子孫

分居天下諸大洲居亞細亞洲者生之後也利

未亞岡之後也歐羅巴雅佛德之後也三人之

裔遍於諸國蕃庶之餘慨念先世溺於洪水輒

惴惴恐復丁其患相勉共守神天禁律毋稍違

犯上帝憐之於是與其人約自今以往不復再



生洪水使百姓得永免災害因設一虹蜺於雲端每收雨卽出以爲識別無論霖雨盛霽人望見虹蜺卽知上帝示人以晴霽不畏積水泛溢羣藉欣慰矣洪水後百年挪亞子孫尙居亞細亞之西家旣相近口音尙能畫一慮諸族將日益分衍不能不散處四方欲建一塢高與雲齊使散處後得望之以爲準的上帝不悅故令其人各殊其土語令彼此語音不通則難以聚謀

塢無從建於是及半而廢已四千四十有四年

於茲矣

紀事錄云自開天地至二千八百零五年人作事不合天打亂其口音至今共

四千四十四年蓋謂自開天地至今計五千八百四十八年旣無據證諸書亦復參差說詳後

由茲而後人自爲族各遷地以居惟亞細亞洲

則漢人猶守其故土焉閃爲十一世生亞法撒

按亞法撒似卽雅弗德之異音而爲十二世亞世次不同其不便考證多類此

法撒生該南爲十三世該南生撒拉爲十四世

撒拉生以伯耳爲十五世以伯耳生比列爲十

六世比列生流爲十七世流生西鹿爲十八世  
西鹿生拿鶴爲十九世拿鶴生提喇爲二十  
世提喇生亞伯拉罕爲二十一世行事亦能凜  
遵帝命年已百歲其妻撒喇已絕孕帝許以有  
子後果生一子曰以撒革爲二十二世帝欲試  
之俟其祭使以子爲祭品亞伯拉罕欣順帝旨  
挈以撒革登山將殺而舉祭以撒革不知己之  
將殺也問祭何不備犧牲父答以帝已有所命

之矣語次方欲操刃帝急止之曰勿害爾子爾  
雖獨子尙知捨以敬我洵可嘉尙當增爾苗裔  
使如天之星宿海之沙塵且使爾後戰則勝敵  
而伯必服仲亞伯拉罕受命率其子還求積善  
之家之女曰哩別迦者爲之婦奉亞伯拉罕壽  
至百七十五而終以撒革生二子次爲耶哥伯  
爲二十三世不能和其兄逃於遠方事其叔爲  
僕爲之牧養生畜長娶二妻生十有二子少者



名約弗色爲二十四世溺愛於父衣以美衣諸  
兄潛嫉之會約弗色夢與兄收穫先已後兄兄  
亦力爲之斂也已復夢太陽太陰并十一星伏  
而拜已具告諸兄兄怒曰然則我將事爾乎自  
是恨益甚約弗色偶以父命出場視諸兄牧羊  
兄觸前忿謀殺之懼後禍乃相與禁於山穴俟  
商販者過鬻以爲奴取他血塗弟衣歸告父謂  
弟爲獸食父雖痛傷終意上帝所命無如何也

商挈約弗色轉鬻於麥西國

麥西卽埃及多國亦卽厄日多譯音

異也主者才之使理家務輒能盡力所事主益喜

主婦故淫蕩將招與歡約弗色畏帝律不敢萌  
愆念一日主他出獨遇於閨主母復逼之約弗  
色逃避遺其下衣婦羞極成怒夫還則以僕戲  
已愬且出遺衣實之主不能察遽禁約弗色於  
獄司獄者察其無辜合權司獄事先是同禁二  
人並官侍御而被罪者獄中各感夢莫能自解

約弗色爲占之得一吉一凶未幾一人復官一  
被戮占盡驗至是麥西國王亦得異夢索解無  
當意者侍御乃薦使試占焉謂兆宜先豐後荒  
勸王多積穀備凶歲王從之命主倉廩麥西地  
無雨雹藉泥祿河泛潤田土苗隨長穀產甚豐  
時四方大旱卽商湯未禱桑林得雨前也諸國  
粟盡麥西以餘糧濟之存活甚衆庫藏亦驟充  
盈於是王賢約弗色立以爲相約弗色旣貴會

其父使諸兄至麥西告糴相見各悔罪約弗色  
不之校盡徙其屬七十人來居焉麥西初名麥  
西喇音創自虞舜時其君爲挪阿之孫後阿細  
曼塔喇嗣當夏時徙其都居南方地舊崇陰陽  
奉牛犬貓豺鱷鷹爲神祭日牛前焚香自約弗  
色心敬上帝雖被囚非其罪而未嘗稍形怨懟  
卒蒙帝祐由僕隸升於顯位如此約色弗亦名  
猶大娶大馬氏生法哩士

一云撒拉

爲二十五世法



哩士生以士崙爲二十六世以士崙生亞蘭爲  
二十七世亞蘭生亞米拿撻爲二十八世亞米  
拿撻生拿遜爲二十九世拿遜生撒門爲三十  
世娶拉合氏生破亞斯爲三十一世娶路得氏  
生阿別爲三十二世阿別生耶西爲三十三世  
耶西生大辟王一云大五得王爲三十四世大辟王當  
周康王三年攻服蠻族驅之出以其地之耶路  
撒冷爲都卽耶蘇被執之地民歸之文風蔚起王實號

文魁撰聖詩贊咏上帝且立禮儀崇拜焉乃矢志建殿堂上帝遣聖神傳諭禁之曰王曾以戰鬪染惡習不可妄建堂殿時鄰國新喪王遣使賀嗣君卽位嗣君不道拘其使大辟王命將伐之師旣出而王畱偶窺見沐浴女子有豔色遂召而淫焉已受孕侍臣有言其夫爲營兵方在陣者王立召還令仍歸與妻處其夫恥之不從竟露宿終夕次日趨返營王密諭其帥派於前

鋒旋戰死王聞喜甚卽置婦於宮掖生子猶日  
宜淫不已上帝震怒謂其罪甚重律無可逭時  
有聖神奉帝命見王設諭曰今有兩人同居一  
邑一人富有畜牧其一貧止養一羔愛之甚食  
以其子之食而飲以自奉之器也會富者忽饗  
遠客具饌乃自惜己畜而奪貧者之獨羔王以  
爲何如王曰誅之耳聖神曰王卽其人也王宮  
妾不可勝數乃以勢而強奪他人之婦玩視帝

律他日王宮妾亦爲人淫新產子且亡不可救  
矣王大悔飲泣茹齋獨宿禱天求垂憫未幾新  
產子果殤時朝綱紊亂世子以淫污其外妹之  
故畏罪逃出旋矢悔王宥之復旋都遂結黨逐  
王王跣足奔勤王師與世子戰殺之得復辟蓋  
上帝赦而脫其厄也旣而復萌驕侈下令編民  
戶籍其臣力諫不從編戶計得壯民百三十萬  
猝遭疫癘王又悔罪祈天除禍帝復矜而赦之



在四十年及老常病寒以處女同衾温焉彌留之際遺囑謂儲君瑣羅門曰速遵上帝正律毋自陷邪行以蹈罪惡倘崇拜誠敬則奕世咸休言訖而瞑蓋觀王之始終可知犯罪者能痛悔終邀上帝垂憫也瑣羅門一云出於大辟繼妻本烏嘿亞之婦者為三十五世生羅被暗一云馬大太為三十六世羅被暗生亞庇亞一云為三十七世亞庇亞生亞撒一云米利亞為三十八世亞撒

生耶河沙法一云利亞金為三十九世耶河沙法生

約蘭一云約南為四十世約蘭生烏西亞一云約色

往祖孫父子同名者必有一號別之耶穌父約色弗固與祖同即母馬利亞當其時亦多同之者為四十一世烏西亞生約淡一云猶大為四十二

世約淡生亞哈斯一云西面為四十三世亞哈斯生

希洗家一云利未為四十四世希洗家生馬拿西一云

馬達為四十五世馬拿西生啞們一云約琳為四十六

世啞們生約西亞一云利以設為四十七世約西亞

生耶哥尼亞一云約西為四十八世遷居巴別倫地

耶哥尼亞生撒拉帖一云耳為四十九世撒拉帖

生瓊羅巴別一云耳為五十世瓊羅巴別生亞

庇欲一云歌三為五十一世亞庇欲生以利亞金一云

亞底為五十二世以利亞金生亞槩一云麥基為五十

三世亞槩生撒督一云尼哩為五十四世撒督生亞

金一云撒拉帖為五十五世亞金生以律一云羅巴別為

五十六世以律生以利亞薩一云哩撒為五十七世

以利亞薩生馬但一云亞拿為五十八世馬但生

耶哥伯一云猶大為五十九世耶哥伯生約色弗耶穌祖父

名並與以撒之子及孫兩世重同不可解約色弗一云若翰一作若瑟為六十

世約色弗生耶穌蓋始生人類者亞姆之六十

一世孫也路加福音約色弗後尚有西米至約色弗凡十六世以行論要畧傳證之

云自亞伯拉罕至耶穌四十二代則路加所增者無著矣今據馬太福音自亞伯拉

罕歷十四世為如大國之大辟王在周武王時

一云大辟王以周康王三年嗣位由武王代紂之年至康王三年已閱四十八年矣今姑各按



各書敘之此  
據行論要畧

又歷十四世至耶哥尼亞在周簡  
王時再歷十四世而至耶穌則為亞伯拉罕之

四十二世孫也  
按行論要畧稱亞伯拉罕在夏  
芒王在位之年今由夏后芒元

歲推至周康王三年已闕九百四十九年即至  
武王十三年代商亦九百又六年而自康王三

年推至簡王元年止四百九十二年是亞伯拉  
罕至大辟之十四世其年幾倍於大辟後至耶

哥尼亞之十四世矣即自周簡王至漢哀帝二  
年耶穌生中闕七百八十五年是耶穌以上之

十四世亦視亞伯拉罕以下之十四世  
長短相懸動以數百年情事亦不可解

帝之愛  
此言彼  
亞伯拉罕也實以諾厄裔久忘帝恩而奉事菩

薩緣是擇而取之與結約  
如大俗每立契約奉  
事從摩西者為舊約

耶穌者為新約載之  
者名其器曰約箱設為割損之禮是為夏后

芒在位之年以地中海東隅距  
中國西向萬

有餘里後稱如大今為以至比多國者賜亞氏

後使居之正當商湯禱旱時也  
按自夏后芒元  
歲推至商王湯

二十有八祀以大旱禱桑林之年相去凡二  
百五十四年去亞伯拉罕之受天眷乃遠甚

而以至比多王虐遇其民下令民棄所生男有

摩西者亦亞氏裔生有神容三日棄諸河濱一

貴人見之撫以爲子及長每念其宗族既苦王  
虐輒爲兄弟手又怨家又以勸止爭鬪故爲鬪  
者所斥辱於是率民出其國時亞氏子孫已六  
十萬人矣摩西旣出則爲旅於米田之地生二  
子居於曠野凡四十年商祖辛之十有四祀按紀  
事錄云自開天地至天與摩西在西乃山諭世  
十誠時二千五百十四年自摩西後至今三千  
三百三十五年書作於道光甲辰逆推卽祖辛時矣  
摩西在西乃山上見  
雷電霹靂烟焰滿山天神聖每瑟以帝命諸書竟有

云上帝親臨者諭以十誠書於山後兩石其前四誠屬  
天事者爲一石一曰惟事天不可祀別神二曰  
凡日月星及人獸昆蟲鱗介之像皆不可造而  
拜之三曰不可用真神聖名四曰安息日以聖  
潔守之前六日真神造化天地海山凡在其日  
內者可勞力工藝惟第七日真神安息不可作  
工後六誠屬人事者別爲一石一曰孝敬父母  
二曰毋殺人三曰毋犯姦四曰毋偷竊五曰毋



妄證六日毋貪想他人財物妻女屋宇僕婢牲口摩西既得此十誡又自爲聖書以勸其國人皆守而信之謂之神天律例創造殿堂以祀上帝堂有主其祀事者前堂曰聖所祭司守之後堂曰至聖所惟祭主乃得入其下有書士有長老七日一聚拜拜日卽不事工作取牛羊血調水以紅絛及牛藤草灑而書之以示清淨謂之契約之血

契約卽亞伯拉罕所結之約以奉事者

謂灑血則罪

得赦也又設教師以所傳天律教民初入堂祀必以水潔其額曰領洗其以油傅胸者曰基督譯言受聖油惟王嗣位得行之民旣咸信摩西於是逐去土番設官如 中國按察司者治其地卽後所名如大者是也未幾民復事偶像天乃罰之遂有異族侵服其國如大民悔罪自是復漸強盛迨周室初興時其王自背天律招民怨國遂亂歷三紀而後分國爲二曰以色列以

勒曰如大如大之名始此兩國人時自爭戰簡  
王時爲蠻族所勝如大舊民移於外邦七十年  
始復還故國師士又得天預示救世主降生於  
亞氏時方與諸鄰戰自周靈王迄漢元帝年然  
後如大之王曰希羅得者爲羅馬國所服屬之  
至哀帝元壽二年庚申而耶穌生按諸書稱哀  
帝二年生耶  
蘇於如德亞國惟錢氏景教考云生當隋開皇  
之世與西人所撰行論要畧云生漢孝成帝年  
並異此如大卽耶穌時之猶太國也亦謂之如  
據明史

德亞耶穌生後數百年并於亞拉比亞國後西  
域土番據之名土爾其今則爲以至比多人所  
據矣地在亞細亞洲之西亞非利加洲陸地之  
東北長六百餘里廣二百五十里北極出地三  
十一度至三十三度半東界亞拉比亞國西瀕  
地中海南界以土買北至王嫩山中分三省西  
曰加利利所屬有拿撒勒北曰非尼基所屬有  
撒馬利亞南曰如氏亞城曰耶路撒冷大辟王



所居也所屬有伯利恆其東有約耳但河入死  
海北有加利利湖耶穌所生則伯利恆郡也時  
聖書已盛行而守聖書者復各以己意發揮爲  
聖錄大抵言亞氏後必有受聖油爲基督者歷  
時既久傳習遂分兩教一曰法利西教一曰撒  
吐西教於時羣喙雜起論愈離奇故自漢建始  
元年以來如大人自以亞氏就衰日延頸企足  
以望其族屬之復創祖業起而得受聖油遂去

敵人而興其本國蓋聖書故預言將有救世基  
督者出也華言救者希比利俗謂之耶穌亦謂  
之基利斯督或從省曰基督卽所云受油傳聖  
經特借此名救世者謂如王之得位救民而解  
者相傳遂沿是而誤迨若翰生而後知救世者  
在傳教不在得位也此下自耶穌始至死後  
以諸聖皆彼教語利撒革一云名意司教殿堂始終不倦偶於  
拜日天神伽伯烈示現謂爾當生子爲救世者

之先驅爲之開路而確證焉以利撒革聞卽瘖不能與人語未幾果生子受割損禮後始復能言名其子曰若翰譯言有福寵仁慈也耶穌之母曰馬利亞若亞敬之女也娶婦曰亞納居拿撒勒屬加利利省無子止馬利亞在室許字五得王裔卽大辟王約色弗待年未嫁一云天神默示許配若瑟今據行論要畧及馬太等福音又一作若色弗若翰母以利撒革卽馬利亞一云若翰母爲馬利亞中表姊今據行論要畧年長先嫁孕若

翰時年已老矣而馬利亞方年十四有天神嘉俾陁爾者報之謂天主費畧選爾爲母將以童身不感而孕又告以以利撒革亦老得異妊將來爲爾子證明救世之蹟故馬利亞聞亟至颯加利亞家訪之會以利撒革孕若翰已六閱月口不能言其故其腹中兒則已知馬利亞至從胎躍動聲出自腹言馬利亞今已受胎所產爲救世天主言已復向稱賀馬利亞聞益自喜留



居三月至若翰生乃還所居從此漸覺懷有胎  
 娠約色弗以聘妻未嫁而孕疑欲休之旋夢如  
 天神言即娶馬利亞同居如大時已臣屬羅馬  
 國羅馬王曰奧古士都一云奧斯多令所屬國民無  
 論男女老幼有僑寓別地者皆親詣其本籍報  
 名約色弗本大辟王族遷居加利利省一云尼亞利利  
 拿撒勒邑至是偕其婦馬利亞歸耶路撒冷城  
 寓於旅邸遂生耶穌以客次無隙地裹以常衣

置之馬槽而乳之生時眾星交光天神環衛空  
 中聞樂音故夫婦亦伏而拜之有牧童方守夜  
 見異光羣起遇天神示以故相與跡至兒所拜  
 兒於槽出語人以所見於是喧傳邑境如大王  
 希羅得一云黑落得譯音異也性極猜忌適有賢士三人  
 至自東方見王問曰聞有生為猶大國王者安  
 在吾等於東識其星應今願得一見也希羅得  
 遽召耶路撒冷祭司與書士議僉言聖錄預載

其事復召三人詢以星應期日亟令往伯利恆  
驗之時生已八日約色弗已偕婦子歸行古割  
禮矣生十有三日三人以王命至無導者隨星  
光遽止所居人見兒遽俯伏行禮出所攜黃金  
乳香彌臘即沒藥也三品獻之四字經云有三  
王來朝蓋謂鄰  
國酋長也今一云蘇合其夕三人同夢神誠使勿復返見  
據馬太福音  
希羅得三人遂從他道去如大俗自摩西後凡  
初生男者獻於天以雙鴿代之生四十日馬利

亞抱之入殿堂祭獻有耆年曰西默及節婦曰  
亞納者爲國人所敬禮見耶穌至觸古經語爲  
讚頌不已舉國遂多傳述其事者希羅得旣怒  
三人之戲已又懼古經將驗謀殺之以絕其禍  
天神以告馬利亞使避於厄日多國即麥西亦  
稱以至比  
多乃偕約色弗挈子出走希羅得大索伯利恆  
凡嬰孩生二年者悉殲焉而終不得耶穌所在  
厄日多舊俗惟事魔像先是有神曰日勒彌亞



者爲謠語其衆曰童女抱子忽來至此千萬魔  
像盡成粉壘及耶穌隨父母至衆憶神謠悉毀  
所奉魔像而別畫母抱子圖供禮焉越七年希  
羅得死神復告之使返其國乃復隨父母歸如  
大知希羅得子亞基老士嗣立懼仍不免乃還  
遷加利利省之拿撒勒居焉

一云納雜勒  
譯音異也其俗

凡男子稍長令其歲至所都城殿堂瞻禮耶穌  
年十二隨父母往行禮畢還至半途失之詢之

同行無知者時行已一日矣乃復入城遍覓三  
日得諸殿堂方與教師輩辨論謂其母曰吾在  
父所何覓爲蓋殿堂所以祀天帝已隱然謂天  
爲父矣羅馬旣服如大益循天律其民乃多背  
犯者若翰自垂齡逮三十皆隱村野不與民接  
旣病民俗紛歧乃服駝毛圍皮帶餐螞蚱野密  
出而勸導爲民行領洗以除罪惡民頗信之有  
問聞救世者已出豈卽爾耶若翰曰否其人將

後我至而所能較我超蓋律例自摩西立而真理則由彼而成也偶領洗約耳但河濱耶穌亦行教到此而當河適相值欲求若翰爲其行洗若翰辭曰吾將求洗於爾而爾乃求洗於我乎耶穌終領其洗洗甫畢聞若有聲自天來者云此吾愛子也若翰洗耶穌後他處傳教每直言招人怨忌會如大國王奪其弟非利百之妻以爲婦諸說並云希羅得時事然既云希羅得欲殺耶穌故避於厄日多七年俟其死而後

歸歸久而後遇若翰行洗若翰之諫又怒若翰行洗後事豈非矛盾乎其說往往如此直諫置之獄偶飲其羣下使其婦舞以侑觴娛客王喜誓如其意而賞之問所欲其婦遽請若翰之首不得已遂殺之若翰既枉死而耶穌專行其教自近而遠矣年三十神引之適野不食不飲凡四十晝夜饑甚有魔戲之曰若果天之子何不化石爲餅以自飽乎強掖之登殿堂使立屋脊上曰盍自投下神必扶爾無傷也既又



攜之登高嶺使之四望戲之曰若拜我當以所

見山河為贈耶穌正拒辨間尋見天神來衛魔

遽遁去三十一決意他出行教於外先至加利

利海濱有兄弟為漁者曰彼多羅門曰安得

路即安得烈一並從之遊復有曰耶哥伯曰約

翰耶哥伯本約色弗之父然夷俗祖孫父子往

殊而傳聞又異也亦兄弟同業漁者為西庇

太之子與腓利百皆棄家從之五人既從耶穌

相與入城瞻禮殿門外多商賈市牲畜者壅不

可入耶穌以鞭逐之曰若輩何忍以我父之堂

為市哉當是時眾已譏其妄矣彼多羅妻母病

瘳耶穌按之而愈自是所在求醫者踵相接凡

跛者瘖者瞽者治之病頓失偶以安息日為人

治病為如大人所不容謀殺之耶穌罕譬百端

謂若翰不過一燈光耳尚為眾所信况我行教

之功出彼上哉故本地人目覩其蹟而不測其

所言信而復疑之而聲名則已傳播於遠邇矣  
每過城邑從行者衆不便講說則登山而坐集  
從者講至終日復爲人所逐避而獲免一日挈  
弟子渡海將抵革加撒中流颶驟作舟幾覆耶  
穌方寐弟子懼呼之耶穌叱風風旋息及岸有  
鬼附二人居荒塚者不使前旁有羣豕耶穌令  
鬼入諸豕隊豕驟奔突相逐入海溺死牧者走  
告城中人共出止耶穌勿入其境遂歸鄉里一

宦家女已死延耶穌至執其手卽活又途遇送  
葬者其婦哭之哀耶穌憐之止喪車啓視亦活  
其時法利西教徒尙衆每守其師說與耶穌爭  
適瞻禮日卽安息日巡行田壤弟子之從行者饑採  
禾穗食之法利西徒以爲犯律欲挾以告於官  
會其日有患癱瘓者來就醫旋痊法利西徒輩  
愈不平耶穌曉之謂瞻禮日當作善戒惡醫人  
善事也律何害乎事遂寢而疑謗終未息書士



語耶穌曰彼見醫治靈異猶且不信何不使見  
天上證驗以折服其心乎耶穌曰彼惡類也我  
不欲以他靈異示之時已有十二弟子為彼得  
羅安得路耶哥伯約翰腓利百五五人同時及  
門其次第至者曰巴多羅買

一云巴耳  
多羅茂曰多馬

一云多曰馬太

一云  
馬寶

舊為關吏捨役入教曰耶

哥伯

前耶哥伯為西庇太之子此為  
亞勒非之子名同而族異也

曰利未

利此五士姓曰西門

彼得羅亦稱西  
門此為迦南人

曰猶大士

迦掠人此十二人者日與耶穌俱耶穌乃使分行

本國以色列人家戒令勿入異邦勿行撒馬亞

邑且諭之曰此去人或不信則執爾於官吾臨

時使神附爾言其毋畏凡接爾者猶之接我且

猶之接所遣我之天也從此十二弟子各遊他

鄉耶穌自與其他徒行教方集眾講論其母偕

其兄弟適至或告之曰爾母兄弟候於門外耶

穌曰吾母為誰兄弟為誰凡奉天者皆吾母吾

兄弟姊妹也既而歸教本邑偶作變水爲酒諸戲而不甚著其靈蹟人皆疑之耶穌曰聖人類尊貴惟居本家族則不然此常情也於是又去而之他所至民隨行者五千人嘗日暮不得食其徒腓利百五出錢二百治具不足供耶穌乃以五餅二魚祝而分之人盡果腹斂其餘尙可實十二筐夜令弟子先登舟遭風耶穌步水面及船風隨止既渡湖至其尼撒烈地有以當飯

不先濯手爲犯律詰之者耶穌不可與爭棄之往士羅及西頓又渡湖至加利利從之者四千人亦以魚餅飽之至覘立城與弟子私登高山變其容如陽光衣如雪皓視古聖摩西及以利亞咸來見須臾而隱既復語弟子曰我不久當赴耶路撒冷城必爲祭主書士所害然第三日必復活矣彼得羅執手勸勿往耶穌曰此我將流血以救人也凡從我者必克己忍難如欲保



全生命我不救之爲我捐命者我救之衆中有  
爲我而捨其父母兄弟妻子田宅者吾登天後  
必十倍償之倘生前富有而死後沉淪地獄將  
何益哉抵迦百拿翁關吏索稅錢耶穌令彼得  
羅詣海濱釣取魚先上鈎者口中所啣錢子之  
如大人素知約色弗爲人傭木工貧困甚而耶  
穌生又未嘗就學識字且法利西撒吐西兩教  
之徒並恃舊爲衆信合力攻擊而耶穌又往往

於駁論間語侵其衆於是如大人益憤怒見則  
以石擊之旣屢謹避之矣然當瞻禮日男婦必  
咸集每求治病益爲所藉口耶穌恨其天堂之  
說不行於本地而十二宗徒恐不足敷宣佈也  
遂廣選七十人爲徒再廣之爲百二十人將使  
普遍天下授其教於異國其信之篤而不在弟  
子之列者復五百人所謂五百弟兄者是也嘗  
集徒爲之設喻以明本地人將不得入天國之

耳魚身勇入中國記  
故曰某甲爲具延賓賓託故不至甲乃令其僕  
入市遇殘疾者揖之客筵復延郊野人充賓數  
蓋憾先召之賓不能嘗我一嚮也旣入耶路撒  
冷城遇撒吐西徒相與難之曰爾言死後可復  
活今以摩西傳兄死弟可娶嫂之法推之設弟  
兄七人以次各娶其故兄之妻矣然則復活之  
後誰得此妻者耶穌以復活無嫁娶爲解其徒  
亦終無所據以破之也耶穌所交拉撒路者死

其妹馬耳大遣人來告急往弔之死四日已葬  
矣耶穌令除墓石出之則已活闔城閩傳不已  
如大人報教師以耶穌所行事教師曰彼所爲  
至於能起死人若此他日必爲人所堅信將奪  
吾職吾教廢吾國亡矣與其祭司書士長老輩  
謀僉曰死衆人孰與死一人哉兩教之黨亦羣  
起附和將誘殺拉撒路以杜衆口而祭司殺耶  
穌之意愈決以屆節期恐民因作亂不敢發耶



耶穌知而潛匿不得其所密購其可與謀者得猶大士卽十二弟子之一也賂以三十金相約伺隙爲應時耶穌由伯大尼再入耶路撒冷城使門人設瞻禮宴將食耶穌呼水遍爲弟子濯足曰爾輩皆潔矣獨一人不潔奈何蓋爾中有人將賣我者衆問賣師者誰耶穌曰吾納餅於湯與之者是已隨以湯付猶大士猶大士竟食之席畢猶大士先出耶穌擘餅食其徒曰此吾體

也又酌葡萄酒飲之曰此吾血也自今登天而後復飲食矣與十一人出城相將登橄欖山渡

基得崙溪至日色馬尼之園

一名畧西馬尼

所常遊處

也語衆曰我復生必先往加利利彼多羅曰師果死吾願捐生耶穌曰此夜雞未鳴時爾將三言不識我矣於是對天三次祈免弟子咸熟睡耶穌醒之曰時至矣言未已如大士率衆跡至呼曰夫子衆遂就縛之彼多羅揮劍拒祭司之

僕墮其耳耶蘇叱令退去取耳合之解於教司  
一云解徒衆逃逸惟彼多羅隨行至署寒甚就  
之四司火二婢子先後自內出並戲曰爾豈耶蘇黨耶  
役聞亦詰之三以不識對正雞鳴時也祭司之  
首曰該亞法詢以傳教之意與門徒之數耶蘇  
對曰問聽我者卽知我所傳何語矣又招告者  
證之不得其情又證以彼嘗言欲毀殿堂三日  
復作之語蓋耶蘇前實爲此言欲自炫其術也

至是不辨祭司曰爾眞上帝之子乎曰是也觀  
者又唾而擊之蒙其目問誰實擊爾一時兵役  
共戲笑之次早獄未決則解諸羅馬所命官之  
守耶路撒冷曰彼拉多者一云般雀  
所辣多定之如大

人隨往懼入署污濁他日不能與禮食則鬪於  
門彼拉多出諭以所告無大罪宜立釋之衆不  
服彼拉多入問耶蘇曰爾爲如大之王否答曰  
吾爲此而生也彼拉多亦不能決以送如大國



王行論要畧云卽希羅王習聞耶穌事奇亟欲

試之而耶穌不爲作一靈異還以付彼拉多彼

拉多終欲釋之故事每遇瞻禮日必縱一囚遂

取他囚與耶穌並立問衆曰誰當縱者祭主及

法利西徒疊呼請放他囚而以十字架釘耶穌

彼拉多因其妻以夢勸欲銷民怒縛於石柱鞭

之五千血流遍地兵役褫其衣而被以敝王服

織棘爲冠箍其首謂其僭王故戲辱之衆因復

大譁曰釋僭王者叛臣也彼拉多迫於人言乃

拘耶穌於鋪磚處希伯來土音所稱高臺者也

至午衆聚噪如初乃令自負十字架至嶧峨大

釘手足架上以希伯來希臘羅馬三國書分題

曰如大之王拿撒勒人耶穌祭司謂宜云自稱

如大王彼拉多不肯易書當負架時耶穌已力

乏行甚艱所褫服又分於守卒受釘益覺痛苦

同釘二賊夾其左右其一譁之曰曷不自救以

救我其一正色責之因目耶穌謂他日登天國  
勿忘我耶穌答曰今日卽偕往矣其母馬利亞  
及其從母爲革沐法妻又抹大拉之女亦並名  
馬利亞者久從耶穌來與弟子若翰同立架側  
耶穌目若翰謂母曰此卽爾子又目母謂若翰  
曰此卽爾母將以母託之也渴甚不得飲或以  
懸浸醋置於草上予之耶穌吮訖厲聲呼曰  
啞啞啞啞嗎噉噉啞啞啞啞譯言上帝上帝何爲棄

我也言已氣絕一卒以戟刺其右胸血如注年

三十有三時自午至申大地昏暗

一云時月東行掩蔽日光

一云太陽如夜地震石殿堂帳帷無故自裂有

破此據馬可所傳福音

富人

一云私信耶穌者亦名約色弗

一云其徒尼畧得若

瑟二人

求其屍裏以布與兩馬利亞葬之死之

日爲預備節卽安息之先一日也猶大士目觀

死狀忽大悔擲所賄還於祭司出而自縊祭司

議曰是固賣血者歸諸庫非所宜乃買地爲義



塚後人稱之曰血田安息後一日而馬利亞及撒羅米具香將爲塗屍至則墓石已開一白衣者語曰耶穌已三日復活往加利利矣諸婦歸述於諸徒彼得羅親往驗之惟殮衣獨存適弟子革流法偕他徒往馬烏鄉途遇一人問胡爲憂形於色革流法以耶穌死不見屍諸婦遇天神告以復活一切語具告之其人曰基督以受苦登天矣隨援聖錄解之旣暮去鄉漸近二人

留與宿入室飯其人擘餅與之二人恍惚間擘餅者殆耶穌也頃刻不見歸以述於諸徒諸徒亦舉耶穌夜至彼得羅室以所傷示徒衆及爲設魚蜜食之事還告之相與太息時弟子多馬士他出未嘗目見以爲妄耶穌忽與見使摩其釘跡皆死後八日事也四十日再與諸徒見重申天國之理與他時大加審判人人復活之事囑令傳教始於加大撒馬利亞次及異族遍於

諸國擇彼得羅掌教稱曰鐸德使主教事尋率諸徒出郭外至阿利物篤山

一云阿裏山

與先死候

於靈薄所之古聖靈魂耶穌於死後所入而領

之來者同時昇天坐於罷德勒之右矣

西國以左右分

貴賤蓋以爲位在諸天神上也時門徒瞻望之不肯去有白衣

天神二降對衆言日後耶穌從天國依然下來

審判生死言訖而去後十日百二十門人頌經

祈禱天神復降衆人首皆見光耀如火焉耶穌

所預囑將來復下人間審判語諸國咸習聞之

未幾遂有惡徒冒耶穌名出煽惑世人多爲所

愚者其人無神異不過恃有魔鬼附其身由是

倡民爲亂因起諸國爭戰以至凶年饑饉地震

後復遭瘟疫有二聖人一日阨諾格者生於洪

水前開關後之六百二十年一日阨里亞生開

關之三千三十年兩人異世同居人未之知也

及是病邪魔壞耶穌之教出而扶之證惡徒妄



託之非如是三年旋遭魔難加以酷刑棄其屍  
於市遍地大震房屋頽圮壓死者七千人衆聞  
空中有神言命兩人升天者於是兩人殘軀復  
活乘雲而去惡徒復假魔力偽稱歸天與人定  
約時日期至果能升空耶穌遣宗神敗其術魔  
遽隕落地中張一巨口吞魔及惡徒收入永苦  
獄矣此下教中事一曰聖號經凡耶穌諸經多者止  
數行其末必有亞孟  
二字故諸書有謂耶穌名啞吧者惟一  
說作真實深信解一說云致囑之意 凡三十

五字教人以十字爲號者一曰天主經凡三十  
七字一曰聖母經聖母者卽馬利亞謂未有天  
地之先天主已簡定其母其福德非衆女所及  
耶穌死後其母年至六十三而死入教者欲求  
天主赦罪增福必求之於其母故有是經也一  
曰信經凡百六十二字以所行事析分節段令  
人思而信之皆所以持誦者謂信之則升天堂  
謗之則墮地獄也凡此皆耶穌所自造傳於其

徒使後持教人與衆守之者也又有七蹟一洗滌二堅振三聖體四痛解五終傳六品級七婚配皆稱聖事之蹟謂天主欲賦寵佑於人因託有形象者以通之洗滌云者蓋人生必有原罪本罪原罪者初生人類之祖名亞姆者違背天命其罪永傳於子孫本罪卽本身自犯十誡之罪耶穌死遺令後來掌教者於世人入教日以清水誦經爲之洗滌卽除夙業盡赦原本二罪

引進者稱曰代父謂有罪者先如已死今入教乃復生如父之生我也又各取先入教有顯蹟稱古聖者之名易其名次食之以鹽謂天主加其神味男子則以油傅其胸與背與頂謂開其心加其力如油之浮而不沉也蓋以白帨示潔淨照以燭示光明也堅振者飲聖水後靈魂猶弱或遇艱難便移心志故以油擦額上以求堅固心神也聖體者耶穌死前一夕手執麵餅酌



酒謂此卽我體我血凡食之者彼與我同入教不領聖體他日卽不能復活痛解者進教後偶有過失法不能再領聖水故令其省察痛悔能自告解而贖則赦之終傳者賦聖寵於病人使臨終而輕其形神之困苦又以油傳其五官以望救也品級者有主教有鐸德入教者先習教禮後從主教考取爲鐸德其權可代天主審罪過而分處之又得主行大祭禮所謂彌撒也婚

配者謂初生人類一男一女自爲配偶故其教不許娶妾而終身亦不得休離其妻也又有八真福一以己財盡施於人而甘貧者爲神貧二有仇不報爲良善三涕泣悔己罪及切代求救人罪四嗜義如饑渴五哀矜困乏善誘愚蒙六心口中清淨七與人和睦八患難中守誠不失身八福皆可登天堂者又以肉身世俗魔鬼爲三仇謂狗耳目四肢之欲囿風俗習染之非皆

當猛省至魔鬼尤能害人靈魂別以十字聖號  
 為退魔器械其後世所定之會規亦有四一主  
 日暨諸瞻禮日宜與彌撒二遵守所定齋期齋  
 有大小大齋不食禽獸之肉午止一餐小齋不  
 限餐數三解罪至少必年一次四領聖體至少  
 亦年一次會名曰厄格肋西亞華言聖諸弟子此彼教  
流行之故當時亦各撰為福音馬太所傳者凡二十八章  
 馬可所傳者凡十六章路加所傳者凡二十四

章約翰所傳者凡二十一章凡外出傳教者必  
 自稱曰聖差稱耶穌曰主而自稱曰僕分地而  
 出恐異地人驟難信奉則必先寄以書反覆推  
 明其教之始終今所傳者有保羅寄羅馬人書  
 凡十六章寄哥林多人書上凡十六章下十三  
 章寄伽拉太人書凡六章寄以弗所人書亦凡  
 六章寄非利比人書凡四章寄哥羅西人書凡  
 四章寄帖撒羅尼迦人書前凡五章後三章寄



提摩太書前凡六章後凡四章寄提都書凡三章寄非利門書一章寄希伯來人書凡十三章耶哥伯爲書凡五章彼得羅爲書上凡五章下三章約翰爲書上凡五章中下各一章復別爲一傳曰天啓之傳卽猶大士亦有書一章似悔其所爲轉念生長以是補過也復有聖差言行傳五卷歷敘傳教宗徒始末宗徒本十二人同門以猶大士致死其師擯不與列故分行傳教

時籤掣得馬提亞補足其缺耶穌所招諸徒大率傭工貧苦之輩惟保羅卽掃羅出身書吏先以

祭司命拘執耶穌之徒耶穌死後自謂目見之遂入其教故立說勸人獨多而不在十二宗徒之內耶穌未死使其徒各出治病驅鬼恆不驗蓋非有符籙咒語爲之傳授但令其堅心信奉而已其訓徒語言亦多隱躍其詞然大旨則由摩西之教再轉一層如古律禁殺人而耶穌則

謂以忿怒加人怒聲叱人卽入地獄古禁邪淫而耶穌則謂見色而慾心生卽心已行姦又目有邪視手有邪作不如折其手剜其目猶爲傷在一體與全身受罪者殊古例可休妻而耶穌則謂休之是致其妻與娶之者皆得姦罪古云以眼報眼以齒報齒愛爾者愛之惡爾者惡之而耶穌則謂人毆爾右面宜轉向左面以待之人迫爾同行一里宜倍兩里仇爾者宜加其愛

惡爾者宜加以恩咒詛爾者反祝之又謂摩西以諸血獻天不能救人惟耶穌自流其血而後人得其救其立教大段如此厥後諸徒傳教人旣衆所至之地漸廣其信者輒鬻其家業爲賙濟貧徒之費其爲書招人從教雖言詞叢造然所稱說較之耶穌所口述者爲獨詳故動人尤易顧因是復招時忌被獲囚者雖迄於死猶堅守不少悔而保羅之被禍尤慘當耶穌之自言



三日必活也祭司輩恐其死後復生他奇幻請於官以卒守其墓及墓開稱再生者喧傳萬口官潛賞防卒使其徒私移屍骸播於衆如大民信之故至今耶穌教遍西海而其土人反有盜屍之說而諸徒之行教也亦斤斤以異族類爲辭所寄書亦專爲他國而作而不敢先於本土者有由也蓋當日兩黨皆摩西之支流餘裔八人已深故耶穌之爲說止推而稍變之其所

以大異於摩西者則在人人將來有復活之日而復活則緣自審判此在如大固以爲明明異於摩西而在諸國則與摩西說同一聞所未聞奇則必動是以難易判然也然據猶大士之書云亞坍卽生人之始者七代孫以諾預言上主必臨帶其萬聖以定罪衆然則斯說之果創自耶穌抑古有此說而耶穌特以已當之是皆未可知耳今但卽其所云復活之言而敷衍之以爲人死

復活審

判教中所最不同者故別著之

靈魂終不消滅凡善者之所以善皆聖神風爲之感化而後得生其靈心守教而升天堂以永享其福其惡者不能信從止慕虛華卒受無量苦蓋人一生善惡定於死日如特釋氏之經懺齋醮可以超度紙錢冥楮可以賄縱則凡富貴者皆天堂中人貧賤者皆地獄中人矣况人世行賄尙有例禁豈宰制萬物之天能容之乎若如所云惡者轉輪人畜生道卽抵其前生罪業

恐塵世造孽者多將飛走之屬遍滿大域矣且果以今生罪惡不使之受罰當世乃移而罰於他生是使他生無罪受罰於理亦未公平又人之靈魂目不得見所云如刀山劍樹種種陰刑安能施於無形之鬼耶如謂近報在己遠報在兒孫不知帝王制法尙罰不及妻孥矧以至大至仁之天道轉有如是之慘酷者乎當羣疑不決之時賴耶穌由天降地示人以地獄之苦謂



如蟲咬不死火燒不滅此特借人間極難受者以形容之耳天堂之樂亦非如世人所豔羨之仙媛環侍飽飫天廚之謂也蓋一遊其境卽身爲天官不須飲食婚配自然無災無害優遊暢快與萬萬天官同贊助上帝於無窮也其審判之目有二曰小審判曰大審判小審止於人死時天主審其善惡定其靈魂之賞罰至大審判則於普天下人復活之日集而公讞之其期爲

天主臨時所定雖他天神不能知也將行大審期前其在上則諸天失序日晦月冥星辰隕墜黑雲滿布雷電轟烈火焰飄飛暴風四起在下則海湧濤洶江川泛濫如血諸畜死滅山邱震裂地體大動耶穌於是降火焚燒民人殆盡而後十字聖架現於空中耶穌駕雲而下舉人類中之貴賤賢愚其生前所行善惡之具載簿籍者盡分攜而覆核之當時其母其徒與萬萬天

使擁護於如大國首令四大神吹鳴號器於是已死之骨骸無論腐壞散失之不同者至此施以全能悉令其與未散之靈魂相爲附合一一復存譬如農夫播種先朽腐而後萌芽前生爲血肉之身再活爲靈神之體自此一活其質永不再壞而耶穌乃各按其善惡而審判之凡有罪者至是乃昭彰顯露於萬耳咸屬之前不復可絲毫隱匿時以左右區分善惡兩類耶穌將

謂右列善者曰爾嘗爲我設飲食居室衣服及疾病監獄皆爲我料理善者方茫不省記耶穌乃徐曉之謂爾以施我至小之徒衆卽與施我同矣又將謂左列惡者曰爾不爲我設飲食居室衣服及疾病監獄皆不爲我料理惡者亦茫不省記耶穌乃徐曉之謂爾不施於我至小之徒衆卽與不施於我同矣當時一賞一罰雖父子兄弟夫婦子孫離別於頃刻不復能相爲瞻



耳爲券其入戶圖言  
顧其惡者卽入地獄同受永禍而善者別予以  
神光使七倍於日光又能穿堅透石凡一切有  
形之物不能碍其出入且萬里一息心有所願  
身卽至之從此不畏寒熱不倦亦不饑在火不  
燒在水不溺永無死法但善與善同快處於兩  
大之中其時天地再新星如月月如日日光視  
前七倍焉所謂復活之說得其曲折如此是以  
彼教專勸人乘未死之先誦經進教及身悔其

所引彼說止此

不信之罪預以備他時之大審判庶不致臨時  
生悔然信非空信必致心誠一禮拜殷勤常以  
十誠自警一入其教終身不得改易其諄諄勸  
人者固謂傳之廣遠方足感耶穌之心而救之  
赦之然究亦同出愛人如己之一心泰西人類  
多智巧之士愈智愈堅守其說以爲己身他時  
再活之根源蓋童而習之稍長而入學讀書所  
見所聞師傅友講耳濡目染竭一生心思才力

咸萃於是無他載籍以啟牖其識見及其偶一

涉獵中國之書則又未有時賢為之指授未得

其綱領乃反處處舉詩書中所載事天者以為

之證故入主出奴牢不可破其端固有自來也

行教之徒雖極力鋪張然遲之又久遞相傳述

源遠而未益分矣於是而大秦教末尼教祇神

斯即波教雜出於隋唐之間雖舒元與有言合天

下三夷寺不足當釋寺一小邑語見重巖寺碑然三者

之來異軌殊趨莫可窮詰大秦即景教也宋敏

求長安志載波斯寺貞觀十二年為大秦胡僧

阿羅斯立在義寧坊街東之北儀鳳二年波斯三卑路斯

請建波斯寺在醴泉坊之東神龍中宗楚客占為宅移

於祇祠之西在布政坊西南隅冊府元龜載天寶四載

九月詔曰波斯經教出自大秦久行中國建寺

因以為名示人必循其本其兩京波斯寺改為

大秦寺州郡宜准此是大秦教之原於波斯也



明萬曆中長安民掘地得唐德宗建中二年景

教流行中國碑頌

按來齋金石刻考畧明崇禎間西安守晉陵鄒靜長先生

幼子化生能行便解合掌禮佛病逝葬崇仁寺南掘得一石乃景教流行碑也既埋千年今始出三世因緣此兒其淨頭陀再來耶

字完好無損者所稱得石年代異

其云三一

妙身无元真主阿羅訶判十字以定四方鼓元

風而生二氣暗空易而天地開日月運而晝夜

作匠成萬物然立初人語與古史所紀天帝六

日造物語畧同其云三一分身景尊彌施訶戢

隱真威同人出代神天宣慶室女誕聖於大秦

景宿告祥波斯覩耀以來貢及權輿造化起地

立天分身出代救度無邊語與降世救民童身

感孕及三王指星象而來朝語同而三一之義

卽天主分而三合而一之說也其云圓廿四聖

有說之舊法設三一淨風無言之新教及魔妄

於是乎悉摧能事斯畢亭午昇真語與摩西以

後兩得天示重立新教逐除魔鬼白日升天語

同其云印持十字

金石萃編十字已泐今據家藏本

及不畜臧

獲均貴賤於人不聚貨財示罄遺於我七日一薦洗心反素語與奉持十字禁用奴婢散財為

神貧七日一禮拜語全同碑以阿羅訶為景教

之主云大秦國阿羅本

長安志作阿羅斯

於太宗貞觀

九年至長安十二年七月詔立大秦寺度僧二

十一人

按長安志初建寺尚稱波斯天寶四年乃易名大秦今碑去其原名所以誇其

國耳高宗詔於諸州各置景寺仍以阿羅本為鎮

國大法王元宗時大秦僧佶和至詔於興慶宮

修功德肅宗時詔靈武等五郡主立景寺至建

中二年而後立碑此大秦景教入中國之緣始

故金石錄補與潛研堂金石文跋尾並以爲卽

今歐羅巴之天主教然其徒未嘗謂教主爲耶

穌也又祆神一教卽波斯教與大秦不同其字

从示从天說文云關中

說文蓋統西域言之

謂天爲祆廣

韻亦曰胡神西國尊天君曰天可汗山曰天山



凡尊者輒以天冠之考長安志祆祠唐武德四

年立

卽在布政司西南隅宗楚客移波斯寺於其鄰者

祠有薩寶府官

以胡人主其祀王溥唐會要波斯西與吐蕃康

居接西北拒佛菽

卽大秦

俗祀天地日月水火西

域事火祆者皆詣波斯受法波斯以摩醯首羅

爲教主號蘇魯支弟子各元真大總長如火山

此據錢氏景教考引宋人姚寬之言

景教碑所謂二百六十五種

肩隨結轍競織法羅或空有以淪二或禱祀以

邀福茫然無得積味之途於是三一幻身出代

以碑繹之則所指三百餘種皆非其教正宗知

波斯原與大秦互異無如波斯教久流內地建

寺在先是以前羅本初至不得不假波斯之名

後既自立宗乃請改名以示異否亦沿流溯源

從既異之後而追稱之耳而波斯之自爲一教

則以此爲明證矣末尼亦曰摩尼志磐統紀引

開元二十年敕云末尼旣爲西胡師法其徒自

行不須科罰大厯六年回紇請荆楊等州置摩

尼寺並見志元和初回紇再朝始以摩尼至新見

唐書回紇傳二年正月請於河南府太原府置摩尼

寺許之見舊唐書憲宗紀其徒咸白冠戒葷酒夜聚淫

穢畫魔王踞坐佛為洗足蓋白靈白蓮之流原

與耶穌之教無涉特以其教因回回以入中國

凡回回所奉之默德那國王穆罕默德既以生

而靈異尊為天使其國語稱別諸接爾設教復專取事天

而天方古史又稱阿丹即亞奉真宰明諭定分

定制傳千餘載洪水泛濫有大聖努海治世使

其徒衆治水因而有人一與摩西耶穌所傳之

說所行之蹟若合符節且後世回人之稱清真

教者祀天禮拜所事胥同又景教碑一曰常然

真寂再曰最隱真威三曰亭午昇真四曰真常

之道五曰占青雲而載真其以真立教最為明

晰而今之清真寺人稱之曰回回堂其自稱則



曰真教寺合觀諸說則未尼本同回回而回回  
 本同景教是二是一似皆從耶穌而來仍與耶  
 穌相混其變亂於後人耳目同而實異異而實  
 同未可為之一一剖其端而理其緒矣按天方古筠泚  
 地亦名天堂又名西域與回回為鄰明宣德間  
 始入貢今之清真寺蓋兩而一之且更自衍其  
 說謂阿丹傳施師師傳努海海傳易卜刺欣欣  
 傳易司馬儀儀傳母撒撒傳達五德德傳爾撒  
 爾撒不得其傳六百年而後穆罕默德生命曰  
 哈德國中有佛經三十藏自阿丹至爾撒得百  
 十有四部其經之降與母撒者名如討刺特降  
 與達五德者名則通爾降與爾撒者名引支納

皆經之大者自穆罕默德按經六千六百六十  
 有六章名曰甫爾加尼其餘則今清真教所誦  
 者其說雖誕然即此可見其與景教天主教各  
 別源流顧所守諸蹟則又確同一鼻孔而出真  
 令人不可至此乃暢加論斷總而論之其所云天堂地獄原與釋  
 推測矣

氏同宗其福善禍淫之說即儒家作善降祥不  
 善降殃之理亦即後儒天堂無則已有則君子  
 登地獄無則已有則小人入之意惟是釋氏之  
 始其宗旨本尚寂滅意主清修而其徒之勸人  
 信奉乃增出拜禱唸誦之事已失之遠矣耶穌

之教則但就日用所行之有益無害於人者爲善而尤以禮拜爲尊崇其勸人信奉之心則視釋氏尤切惟切故殷遂不計其地其勢其人之可傳與否而必專心致志無所不用其勸矣然則其傳教之心迹仍與釋氏小異大同所不同者釋氏以輪迴受生爲賞罰之究竟善惡之出路猶是隨造化爲消長事之有無未可知顧小說家時有魂遊地府者未可執理而驟窮之但

爲儒者之所不道耳此則以復活期在一旦又取死後已化之骨骸至此各賜以靈神使相與永存不壞明知人葬久則骨化塵土且有銷毀於水火猛獸當時已并骨無存者但歸於天能造物何死人之不可起白骨之不可肉則姑舍其事而論其理矣除至善至惡仍各歸天堂地獄外餘則並存世間人類至此無死無生聽此數千萬億不鬼不仙之靈魂充塞天壤無論造



而不化異彼蒼消息盈虛之常且宇宙內亦安  
得有如許廣大福幘載此開闢至今如恆河沙  
之衆將使齊其貴賤親疏於一致乎抑此中復  
爲之區別其等次乎豈日日羣居聚處安於無  
所事事得逍遙翱翔於空虛廖廓之表乎抑既  
各與以神通復責以職守乎將使生前之父子  
兄弟夫婦朋友遇之而漠不相識乎抑仍以類  
聚乎君父至尊舊爲之臣子者乃等諸陌路其

魂也而謂之靈乎且第卽其說而問之天果將  
來有齊集審判之日是生人之類自此終靈魂  
之軀自此始矣無論審判不知遲至何代而後  
舉而自耶穌至今已千餘年矣何以不一行審  
判乎卽以今論 中國生齒數千萬逆推至自  
有生人以來更合以數大洲之死去見在者斷  
斷乎不可以數計明矣然則靈魂遍滿寰區之  
內必待審判而後登者登而入者入也今未登

未入之前自散諸浮閻世界矣果將何地以處之耶雷爲天聲爲響最巨然震驚止百里耳試間分列左右候判之魂當時加以問答能使遍聽而共喻耶不敢知也又釋氏絕去父子婚偶使無爲其徒者則人道立絕其說已立窮矣今所傳十誡中所言孝父母止在能養而必以不勸入教爲不孝又以一夫一婦居室同於始生人類之男女而以娶妾傳嗣爲犯天父之誡故

雖聽絕嗣而不許人有妾媵是又與釋氏同爲內地難行之事矣 中國先聖後聖一中相傳人率性而爲善而希賢希聖皆善也溺於物欲乃漸積於惡矣有善不伐豈望其報爲惡不改難逃於法故朝廷之爵祿車服卽所以待君子也五刑之屬三千所以待小人也至於不孝之子往往殛於震雷又風雹水火癘疫地震動戕百萬生靈有事後之賑恤無事前之防範此又



在聖道治化之外其賞善罰惡之偶驗偶不驗則天道主之竊爲之窺測其端倪似大有以一倣百之微旨寓於其中天地之大雖聖人有所不知則歸於造物之不可測所謂六合之外聖人存而不論六合之內聖人論而不議也故但曰陰陽不測之謂神而已惟王者事天明事地曰陰陽不測之謂神而已惟王者事天明事地察大君爲天地宗子天子之所攸稱也古聖賢所謂畏天敬天不敢褻天者初無日事禱告之

文也天生地成覆載同功禮並尊焉故大禮大工大役之舉各隨其時而昭告之至歲祀之典則冬至祭天於圜邱夏至祭地於方澤馨香上達天地亦鑒觀於有赫而眷祐以命之申重以保之雖諸侯亦止得祭其封內山川不敢設祀天之典以紊其分况百姓乎所謂敬而不敢褻者固在此詩之言昊天有成命帝謂文王書之言皇王上帝穹蒼之表固自有主宰綱維其時

取魚豨蕪乃中國言  
行物生之權於無極者然則助襄盛化發育萬  
有豈無日星風雲雷雨山川岳瀆之靈森列昭  
佈於兩間有是神斯有是禮故王者朝日夕月  
及風雲雷雨五岳四海四瀆各舉其祀皆神祇  
也前代帝王師相凡開物成務及有大功德於  
民者則祀之能爲一方禦災捍患顯然可據者  
則祀之忠於國家捐軀効死者則祀之皆人鬼  
也皆朝廷典禮之所以報也而非一人一事私

禱獻媚而祈其福庇者可同年而語矣至於人  
死則魂升天而魄降地子孫以時舉祭則魂魄  
一聚所謂合漠也祭畢而散焄蒿悽愴之中洋  
洋如在而已其有無祀而求食者在死而精氣  
不息者皆可以爲厲國家於是設壇以祭而安  
之今泰西人知尊天而不知尊地舉國無貴賤  
皆得入堂禮拜守其教讀其書積久已沿爲風  
俗何足深辨惟彼中人意釋教旣入 中國已




耳魚考異八中國言  
遍延郡邑合 中國之賢愚長幼無不合掌祈  
拜於土木偶像之前於是舉一至尊至大至顯  
之天以相形而伸其勸阻彼蓋習見其俗之七  
日行拜以爲 中國之人之溺於釋教者當復  
如是又其所識皆內地商賈者流徒知求利無  
所據以祛其疑彼之爲此過慮厥有所以殊不  
知佛門蔓延至今其徒衆之繁已難屈指合之  
適成天下一大養濟院齊無父子無家室之衆

散置於禪房紺宇俾與蚩蚩之氓並生並育不  
耕而食不織而衣聽其自爲祝禱不責效亦不  
禁止及其犯法則官懲之編其所居隸諸保甲  
與凡民等所以待之者如是蓋此輩信之不能  
利人聽之亦不能損人可杜絕於芽蘖之初萌  
而不能斬刈於枝條之既蔓設一旦痛加禁絕  
亦安能取此數千萬人強移於畝畝村落而保  
其必帖然就安乎且孤老瘋疾育嬰之所經費

耳餘考異之中國說  
三  
皆籌於官獨僧尼全資布施近且多自食其田  
租於公無害也若夫紅教起於元之八思巴黃  
教起於明之宗喀巴同源異派更無關於釋教  
之初宗然西北行國每視爲嚮背焉不過卽其  
化身轉世之奇以優其廩給名號之錫而沿邊  
數百萬互相雄長鷙悍難馴之僧俗因以綏靖  
安衛藏卽以安邊境服黃教卽以服番民此又  
所以示羈縻之大權神銜勒於驅策蓋觀於南

北朝西域之迎法師求舍利者動至數十國各  
以兵爭而後知函夏無塵方隅有謚皆因勢利  
導之所致而然夫豈元代尊崇帝師擾攘國是  
者可足比數哉 中國士大夫間有晚年遁入  
禪悅歸宗清淨譬諸膏粱飽饜之後偶思疏水  
又譬諸色伎雜進豪華已極則必轉嗜夫骨董  
書畫養性情而消清畫其勢然也要亦假其機  
鋒游戲筆墨爲文字禪甚或借其明心見性之





原件短缺

P68

旨以啟靈明以除煩惱已耳一切如舍宅入寺  
設食齋僧則前代少有今更弗尙至於淨髮披  
緇焚香燒頂之事雖在唐代譯經興教之世猶  
斷斷乎無之有一於此則當代儒流羣起而相  
爲指摘不齒於縉紳士林中觀於村氓婦女入  
廟燒香皆爲觸法而謂儒林碩彥覲然衣冠之  
族乃肯乞靈土偶生此愚願哉唐虞三代以來  
周公孔子之道燦然如日月麗天江河行地歷

一名犁鞬在海西故曰海西國地方數千里四  
百餘城其民長大平正類中國故曰大秦欲通  
漢爲安息遮闌不得達延熹九年其王安敦遣  
使自日南通貢晉書亦稱東西南北各數千里  
城周百餘里魏書云都安都城從條支渡海一  
萬里其海傍出猶渤海東西與渤海相望地方  
六千里居兩海之間舊唐書拂菻一名大秦所  
稱王無常人有災異輒廢而更立語與晉書合



其餘殿以象牙爲門香木爲棟所產夜光璧明月珠並與晉魏兩書及新書合今按其教書所謂耶穌行蹟不出加利利撒馬利亞如氏亞三省此外卽指謂異國矣幅幘固不如大秦廣其王父子世及亦不聞有擇賢代立事而海國聞見錄則稱哪嗎爲天主王國由民哞呻沿東南地中海至西多爾民哞呻亦天主之族類其所附圖哪嗎民哞呻南鄰東西兩多爾此與其教

書所云如大歸屬羅馬

卽哪嗎

合會覽圖說所云

今爲西多爾卽其教書滅於土番之所更名今且爲以至比多所有矣意其地爲古大秦國之一隅故大秦景教所謂判十字以定四方者與耶穌死於十字架情事尙在同異之間而不能盡歸脗合也觀新舊兩書無一語及景教入

中國事可知矣若云開闢六千年史書並存則說本無稽明史已譏其誕謾今亦畧爲考證蓋

自萬曆九年利瑪竇始來中土之歲逆推至黃  
帝元年凡四千一百七十八年年代可考而知  
者止此前此則荒遠難稽據春秋元命包以天  
地開闢至春秋魯哀公十四年中閱十紀八十  
三君凡二十六萬七千年而據邵子皇極經世  
所稱元會運世之說推之自開天迄消天爲一  
元統十二萬九千六百年十二會各得萬八百  
年則由開天之子會推至唐堯甲辰之午會凡

歷四萬五千餘年而所謂天地人三皇乃已歷  
八萬一千六百年矣三墳之紀已亡諸說紛陳  
於何徵信今云開闢六千年自據其聖書所載  
洪水以前天帝下與世人問答者初但藏其家  
久之乃抄傳諸國漸傳漸廣共信爲真而轉相  
傳述此與近日西人所纂東西洋每月統記之  
稱造天創地起至道光十四年爲六千五百四  
十七年者同爲據其所據良由海邦舊少紀載





